

mächte. Oder (als die andern sprechen) geschmieret auff den Bauch. Dis magst du auch thun eisner jeglichen Frauen/ zu linden ihre noth/ denn das macht bald geben. Item ihr Puluer mit Essig gesotten/machet die Haut rein von Exter vnd bösem Grinde.

Es spricht Albertus/das Holwurß wunderbarliche krafft habe auß dem fleisch zu ziehen vns verlegt/ Dörner/ oder andere ding so darinn stecken. Solches spricht auch Auicenna.. Ferner spricht er/das sie reinige die Ohren von dem vnflat/vnd Taubheit/wenn das Puluer mit Honig gesotten/darein wirt getreiffet/ vnd läßt sie nicht entern. Wenn sie auch gesotten wirt mit Essig/ vnnnd wirt gestrichen vber das harte Wils/hilffet gar sehr. Die runde ist in allen dingen stärker denn die lange.

Das neun vnd fünffzigste Capitel.

Von der Hundszunge.

**H**undszung ist in Latein genant Cinoglossa/ ist warm vñ feucht im ersten Grad. Sie hat klein spitzige Bletter/ wie eines Hunds Zunge. Grün hat sie grosse krafft/aber so sie dörre ist/hat sie kein krafft. Sie hat krafft zu reizen zu vnkeuschheit. Dis Kraut gekocht/mit Fleisch öle/ oder Schmalz/ bringen wollust. Gekocht vnd mit Zucker gegeben/verzehret Menschen/ stärcket sie gar sehr. Wer auch gar sehr trucken ist an seiner Brust vnd enge/ dem solle man zu trincken geben das Wasser/darinn sie gesotten ist mit Draganto/ das ist ein Harz in den Apoteken fast wol bekant.



Das sechzigste Capitel.

Von Hauswurß.

**H**auswurß hat im Latein viel namen/Als Barba Iouis/Barbaticus/ Semper viua/ vnd ist kalt im andern Grad / vnd trucken im ersten. Grün ist sie grosser krafft/trucken nicht. Sie hat krafft zu kühlen / wenn ein Lüchlein getunckt wirt in ihr Safft/ vnd in Essig/ oder in Agrest/vnd gelegt auff die hitzige Lebern / kühlet gar wol ihre hitze / vnd auch wenn die Leber leidet auß kälte. Das Kraut auch gestossen/vnd auff die heissen Geschwür gelegt / treibet zum erstē zu rück die böse Materi. Oder/wenn sie wirt darauff gelegt/ so sie ganz vollkommen seind/so schadet sie/ Denn sie macht die Materie dick/das sie nicht zeitiget/ vnd vbel mag außgehen / von wegen irer grobheit. Wider alle Gebrant so von Fetter/oder von Wasser/mache ein Salben von irem Safft/vnd Rosenöle/vnd Wachs/aber du solt die Salben nicht aufflegen in den ersten vier Tagen/wenn du gebrant bist/sondern warme ding/das der Rauch werde vorhin außgezogen/als mit Seiffen/ oder mit dem schaum/der auff dem Wasser wirt/darinn man vngelöschten Kalk wirfft/darnach mit der genanten Salben geschmieret. Wider den Blutfluß/ der da geschicht von dem vberigen siedē des Bluts bey der Lebern / vnnnd der Nieren im Sommer/nimb ein Lüchlin/vñ tuncke es in Safft/ vermischet mit Rosenwasser/vnd leg das auff die Stirn/vnd auff den Schlass/vnd an den Hals.



Das ein vnd sechzigste Capitel.

Von Isopen.

**I**sop gleichet sich mit seinem Lateinischen namen Isopus. Er ist warm vnd trucken in dem dritten Grad. Er hat sein krafft im Kraut/vnd in seiner Wurzel. Er reiset zu harnen/vnd zeucht an sich/vnd zertheilet/vnd verzehret. Der Wein in dem er gesotten wirt/ getruncken/

MM ij

füllet